

Yaepyet Cin Raeuj Va Hai

瞬间春暖花开

□ Vangz Gveiyangh / 黄桂香

Gienh saeh neix fatseng youq gou bae diegbya Yungzbenh Siujyoz cihgyau. Baezbaez siengj hwnjdaeu, gou roxnyinh gamjdoengh dangqmaz.

Miz ngoenz ndeu, banringzgvaq ciet goq doegsaw baihlaeng, gyoengq lwgnyez yozcenzbanh caeuq lwghag it nienzgaep humx youq henz ndang gou, boih saw hawj gou dingq. Gyoengqde boih ndaej gig nyinhcaen, gou hix gig angq yawjraen gyoengqde baenzneix haenrengz.

“Ling ling ling……” Gij sing lingz cuengqhag baez yiengj, gyoengq lwgnyez neix lumj duzrwi mbin okrog nei, sikhaek sanq hai, gaem daehsaw buet ok gyausiz. Aenvih bang lwgnyez neix, aen ranz cienzbouh youq ndaw rungh, daj ranz daengz hagdangz gyaedangqmaz. Gyoengqde daj gyanghaet daeuj hagdangz, banringz mbouj ndaej maranz, ndigah baez daengz dangz satlaeng, sim gyoengqde caeux mbin maranz lo. Yienznaeuz gip dauqranz, hoeng, bang lwgnyez neix, cungj mbouj lumz doiq gou gangj “lauxsae, mwngz sinhhoj lo”、“lauxsae ngoenz-

cog raen”、“docih lauxsae” daengj vah ndei. Gou hix simhoengz caeuq gyoengq lwgnyez neix doxbiek. Seizhaenx, gou roxnyinh gij vah gyoengqde lumj rumzcin nei ci dwk ndaw sim gou raeujfwtfwt, hawj gou vuenyungz raixcaix.

Doeklaeng, ndaw gyausiz cij lw boux hagseng ndeu. De heuhguh Cin Yingj, doeg yozcenzbanh. De dwg boux lwgnyez hojlienx youh dwggyaez, ndang iq youh saeq, ngamq ndaej 5 bi. Dingqgangj, seiziq daxboh de cup duzbinj deng gaemh bae gaiduzsoj, daxmeh de deuz lo, mbouj caiq dauqma. De caeuq dahnuengx de cij ndaej caeuq goeng buz caez youq. Cin Yingj byom iq, couh lumj go nywj nei goenqcaej majhung. Gou ciengzseiz yawjraen de, gag roi byoem, swiq naj, daenj buh. Yienznaeuz de ciengzseiz byoem nyungq naj miz di uq, hoeng lwgda de lumj raemx saw nei seuqcingh, gou roxnyinh de dwg boux lingz he. Mbouj loek, de coengmingz gaenx hag, cei maij boih saw. Baez daengz dangz goq boih saw, hagseng it

nienzgaep boih saw, hagseng yozcenzbanh cungj bae guhcaemz. Cij miz de naengh youq henz ndang gou, caeuq hagseng it nienzgaep caez boih saw. Baezbaez seizneix, gou couh got de, son de doeg saw, bang de cingq yaem. De byaengq da ronghsag yawj gou, riengz gou doeg saw, hag ndaej baenzneix nyinhcaen, baenzneix haenqrengz. Mizseiz, gou roxnyinh Cin Yingj couhdwg lwg gou. Aenvih de gyaez hag lai, de boih ndaej haujlai saw, sij cih caezcingj, vanzlij rox veh dozveh. Moix baez gou haenh de guh ndaej ndei, de cungj riunyumnyum dwk gangj:“Docih lauxsae.” Gij riu de lumj seizcin va hailangh, fouz hom vunz hix maez.

Cin Yingj coengmingz lingzleih, baez son couh rox, youh roxsoq, moix baez cuengqhag baema, de cungj rox gangj “lauxsae, ngoenzcog raen”、“lauxsae itloh bingzan” daengj vah hawj vunz sim raeujrub neix. Mizseiz de cienmonz youq bakdou ranz de caj gou daengq naeuz: “Lauxsae, mwngz gwh ci menh di.” De baenzneix saeqsim,

lumj vunzcaen gou nei haeujsim gou.

Ngoenzneix banringzgvaq cuengqhag, Cin Yingj youh byaij doeklaeng. De yaep da ronghsag doiq gou gangj: “Lauxsae, ngoenzcog raen naj. Laux- sae hoh mwngz vuenyungz.” Gou dingqny i gij vah neix, yaepyet roxnyinh cin raeuj va hai. Ndaw uk doq nyoenx ok aen cih “bak biq vangaex”. Gou sikhaek ngeix daengz vabsug gangj “vunz ndujdaeu, singq bonj sienh”. Gij coenz Cin Yingj caemhcai q gij guh de, hawj vunz rox de dwg boux simndei simsienh. Gou yawj gij lwgda ronghliklik de, sawqmwh roxnyinh de couhdwg dahsien gwnzmbwn baij roengzdaeu. Gou byaij gvaqbae, gotumj de, sing unq naeuz: “Docih mwngz Cin Yingj.” Gangj sat, ndaej geiq ndaw daeh lij miz song aen dangz, mbon ok cuengq haeuj lwgfwngz de, naeuz: “Soengq hawj mwngz, lauxsae gyaed mwngz.” “Docih lauxsae.” Cin Yingj cie q gvaq dangz, ok gyausiz bae lo. Ndaw sim de itdingh caeuq gou doxdoengz, saekrim vuenyungz.

Dap Ci

搭 车

□ Cinz Ginhva / 覃金花

Daj iq daengz hung, bae doegsaw, bae haw gyaed, bae mbanj gyaed, gaxgonq couhdwg gwhi danci bae, bae gyaed lailai couh dap banci. Banci dwg fuengbienth vunz raeuz bae gizgyae, hoeng doenghbaez ci noix, diuz roen cungj dwg roen namh lai, gumzgumz gemxgemx. Dap baez banci aeu caj haujlai nanz cij miz gyaed ci ndeu daeuj. Naengh youq gwnz ci, daenh bae daenh dauq, daenh daengz bwt fan mbei boek, gyaed ngunh rueg sag, lij miz vunz dingj cungj muenh bae. Dap baez ci ndeu, baez daengz camh roengz ci lo, ga unq ndang fouz cungj mbouj miz rengz byaij loh bae, lij dwgrengz gvaq dajrauq dajcae.

Daengz doeklaeng mbouj doegsaw le, bae Gvangjdungh dajgoeng, gyaed lailai, dap banci baenzhwnz bae cij daengz. Diuz roen gyaed, gyaed ci hung ndeu dap ndaej geijcib vunz, baenzlai vunz youq gwnz ci, bouboux cungj duet haiz, ndaw ci miz heiq haeufumfum, siengj rueg bae, nyouq gij heiq haeu baenzhwnz raezrangrang,

sinhoj dangqmaz! Daengz byonghhwnz 11、12 diemjung yienghneix, boubouhaici bae gwn caeuzhwnz, gyaed vunz roengz ci seuq gvendou. Mizseiz saedcaih dwg dungx iek hix bae ra huq gwn, byawz rox aen diemq cix dwg diemq cienmonz yaeuh vunz. Mwngz gwn bae 10 maenz, hawj de bak maenz. De ra hawj mwngz 90 maenz, mbawmbaw cungj dwg 10 maenz. Caenda yawj de geq miz 9 mbaw 10 maenz, dawz gvaq gij ngaenz, mbouj nyinhcaen geq couh cuengq roengz ndaw daeh bae. Hoeng, doeklaeng caiq mbon okdaeu geq. Ha, baenzlawz cij miz song mbaw ndwi lo?

Hwnz ndeu raezrangrang, youq gwnz ci baenzlawz mbouj raninz ne? Hoeng, gwnz ci baenzlai vunz, byonghhwnz baez ndaep daeng, gwnz ci laepngaungau, maz cungj yawj mbouj raen, aeu re miz gaijdiuq caeg gij ngaenz ndaw daeh bonjfaenh roxnaeuz soujgih, baenzlawz cungj dwg aen sim ndenriri, lau deng saeh rwix. Gou doek gvaq ngaenz, doek



Makgaivaiz rangdiemz dahsau gyaundei.

Veiz Cauweij ingj

gvaq soujgih, cei lau couhdwg bungz daengz vunzrwix haenx, ciengj aeu ngaenz, mbouj hawj couh moeb vunz caemhcai aeu mid daeuj camz vunz, mbouj lau dai cij dwg gyaj.

Mboujgvaq, gijneix cungj dwg gij laeh haujlai bi gaxgonq lo. Seizneix okdou mbouj doengz doenghbaez, haujlai vunz bae gizgyae cungj maij dap gauhdez, dungceh lo. Youq cwngfuj raeuz roengzrengz baihlaj,

guk raeuz seizneix haujlai haw singz cungj doeng gauhdez, dungceh lo, hwnj vangj cawx biuq, cinjseiz fat ci, gyaqcienz caeuq dap banci mbouj ca geijlai, doenghbaez dap banci aeu ngoenz ndeu, seizneix dap dungceh buenq ngoenz couh ndaej lo, youh vaiq youh onj youh ancienz, youh miz gijgwn gai dem, fuengbienth lai lo.

Gou maij gij swnghhoz seizneix, engq maij Cungguek raeuz!